

Zeitschrift: Annalas da la Societad Retorumantscha
Herausgeber: Societad Retorumantscha
Band: 87 (1974)

Artikel: Rapport dil cussegl da scola
Autor: Candinas, Theo
DOI: <https://doi.org/10.5169/seals-231206>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 02.04.2025

ETH-Bibliothek Zürich, E-Periodica, <https://www.e-periodica.ch>

defunct staus dirigent dil Chor Viril d'Engiadina. Alla vischnaunca da Puntraschigna ha el surviù 44 onns sco scolast ed organist.

Per ses merets en favur dil cant e dalla cultura romontscha ha el retschert 1969 il premi da radio dalla Cuminonza Radio Romontsch. El ruaussi en pasch!

Cun *dr. Paul Scheuermeier*, ch'ei morts ils 13 d'uost 1973 a Berna en la vegliadetgna d'85 onns, ha in grond e fideivel amitg dils Romontschs bandunau nus per adina. Alla LR ha dr. Paul Scheuermeier rendiu gronds survetschs en grevas damondas. Aschibein en la questiun spinusa dall'Acciun Sutselva (1948) sco era en quella dalla scripziun sursilvana (1959) ei Scheuermeier sespruaus da far cun tut quita il mediatur. Sias lavurs e ses giudicats muossan con fetg e con serius ch'el ei staus engaschus persunalmein e co el ei sestentaus d'arrivar ad in pareri objectiv, solid e ruasseivel. La LR vegn a salvar dr. Paul Scheuermeier en buna ed engrazieivla memoria.

Rapport dil cussegl da scola

Igl onn da scola 1972/73 ha priu sia fin ils 26/27 da zercladur culs examens da diplom. Otg scholaras ein sortidas sco mussadras romontschas en la pratica. Quei ei stau il davos cuors tenor il modus vegl. Dacheudenvi vegn mo in cuors menaus, ed ils examens da recepziun han liug mintga dus onns. Quella midada cun ina instrucziun intensiva da dus onns ei segir sepagada. Schebi che certs cantuns ein revì denton sin ina instrucziun da treis onns, vein nus aspects da vegnir reconuschi cun la fin digl onn dall'Uniun svizra per seminaris da mussadras.

Il cuors current ei staus interruts il december 1973 e mars 1974 d'in praticum da mintgamai treis jamnas. Ils 11 tochen ils 16 da fevrer han las scholaras giu in'jamna da sport si l'alp Quader sur Breil. Nossa directura, sora Florentina Camartin, ha accumpignau las scholaras e giu quita dalla tgira spirtala e corporala. In giuven skiunz, mess a disposiziun digl uffeci cantunal per giuventetgna e sport ha surpriu l'instrucziun da skis. El decuors digl onn da scola han las scholaras giu caschun da frequentar pliras dietas e tedlar referats d'interess cultural e professiunal. Pliras dad ellas fan era part dil Chor romontsch da scolars cantunals e separticipeschan allas reuniuns dalla Montana. Nus beneventein quei contact cul seminari da scolasts e cul gimnasi. Quei augmenta la schientscha professiunala e dat ligioms che pon fructificar il svilup da nossas scholaras.

Ils 3 da mars vein nus giu examens da recepziun per las scholaras d'in niev cuors. Sco experts ed examinaders han funcziunau: dunna Paulina Caduff, Sora Florentina Camartin, Theo Candinas, dna. dr. Fortunata Raming, ser plevon Leo Reinalter, Vinzens Sonder, dna. C. Straub, prof. Victor Stupan

e Hendri Spescha. Da 26 candidatas ha il Cussegl da scola radunau en corpore saviu acceptar per munconza da plaz mo 13. Quei ei il diember maximal ch'ins po fultscher en las stanzas ed entuorn las meisas da scola a disposiziun. Tenor las regions serepartan las scolaras admessas sco suonda: 6 ladinhas, 5 sursilvanhas e 2 surmiranhas.

La fin da zercladur concludin nus igl onn da scola cun la diplomaziun. Quei ei in scalem special en nies svilup, essend che nus savein concluder per l'emprema gada in cuors intensiv e nuninterrut da dus onns.

Ils commembers dil Cussegl da scola han sper la cooperaziun a caschun dils examens giu caschun da s'exprimer en pliras sesidas davart ils problems urgents. Denter auter lein nus menziunar il fatg che l'inspeziun dallas scolettas vegn procurada dacheudenvi da treis inspecturas regionalas, dallas qualas duas fan part dil Cussegl da scola. Quei simplifichescha il menaschi e spargna enqual viadi dil lontan. La survegiladra digl internat ha stuiu far plaz en Casa Romontscha al diember augmentau da scolaras. Pigl avegnir stuein nus tschercar in'otra fuorma da survegilanza.

Concludend less jeu buca tralaschar d'engraziar a tut quels che han attribuiu alla buna atmosfera en nossa scola ed han prestau lavur da rudien. Sora Florentina ha sper la minuziusa formaziun professiunala dallas scolaras da purtar il grev buordi administrativ. Ella coordinescha la lavur interna denter scolaras, magisters e Cussegl da scola e pren contact anoviars. Aschia ha ella denter presentau cun success in plan d'instrucziun cumplet als representants dil departement d'educaziun. Quei ha giu per consequenza ch'il cau dil departement ha declarau che la scolaziun seigi caussa dil cantun. Quei vul bein dir che lez seigi prompts da surprender il deficit da nies seminari tochen a l'integraziun da quel cun la nova scola da dunnas.

Era als commembers dil Cussegl da scola s'auda miu engraziament per la buna e conscienziusa cooperaziun. Il davos, mo buca meins da cor, ditgel jeu engraziel fetg allas scolastas ed als scolasts che han unfriu da lur scart temps liber per l'instrucziun da nossas mussadras. Nus sperein ch'els tegnien la dira era igl onn che vegn.

Per il Cussegl da scola LR

Il president: Theo Candinas